

Voces de Queempostela

Folleto Mensual
de Información

Nº14, Xuño-1997

Editado polo
Colectivo Gai de
Compostela

Retrasos, retrasos e máis retrasos!!!

A preparación do programa de actos do 28 de Xuño acaparou todos os esforzos dos voluntários do CGC, co que o resto das actividades que se estaban a desenvolver ficaron paralizadas durante algúns días. Así, a revista *S'homos* verá retrasada a súa saída en varias semanas, até mediados ou mesmo finais de xullo. O *Voces* de xuño, que tes nas tuas mans, sai a principios de xullo.

Ademais, a preparación da campaña en contra da discriminación homofóbica nos espazos do consumo, que se ha desenvolver en colaboración co CLI, ficou paralizada até o mes de setembro, tras a fin das vacacións. Desde as diferentes comisións de traballo do Colectivo Gai de Compostela pedimos-che desculpas polas molestias causadas

Un 28-X pasado por auga

Este ano o mal tempo, a intensa chuvia, botarou a perder a maioría dos actos programados para o 28-X ao ar libre. Así, non se puideron instalar as mesas informativas e tampouco se pudo celebrar o Maripicnic'97. Haberá que agardar até o vindeiro ano... O que si se celebrou foi a concentración reivindicativa na Pza. do Toral. A máis do CGC, a ela acudiron membr@s do grupo "Mil-Homes" (A Coruña), do Colectivo de Lesbianas Independentes (Santiago) e do Movemento Estudantil Universitario (MEU) con senllas pancartas. Aínda que a concorrência ao acto non foi tan numerosa como nou-

tros anos, leu-se un manifesto e berraron-se consignas reivindicativas. O que si supuxo un éxito foi a festa desa mesma noite. Cunha asistencia de perto de 300 persoas, encheu-se o local, máis tarde do acordado. A recadación foi alta e as actuacións foron o máis aclamado da festa. O CGC espera que para o ano o tempo axude a superar a concorrência deste ano.

Éxito do Vídeo-fórum

O III Ciclo de Vídeo-fórum celebrado tamén co gallo do 28-X na Librería "María Balteira" foi todo un éxito. A sala encheu-se coa proxección de "Beautiful Thing" e de "Cuando cae la noche"; a película de John Waters "Hairspray", coa magnífica interpretación de Divine, xa non tivo a mesma aceptación. O mesmo aconteceu co parladoiro sobre sadomasoquismo, ao que só asistiron 8 persoas que, así e todo, atoparon moi interesante

esta actividade. No que respecta o recital poético, este non se pudo organizar por non estaren dispoñíbeis no día programado as persoas requiridas.

O 28-X noutras cidades

O Colectivo Gai Coruñés "Mil-homes" tamén organizou dous actos co gallo do 28-X: unha festa o día 27 no "Alfaiate" e un coloquio, no mesmo lugar, co-organizado coa Assembleia da Mocidade Independentista. Por outra banda, O grupo GALEGA de Lugo organizou tamén unha festa o propio día 28 no pub "Emo". Finalmente, en Vigo, o Club Faro de Vigo organizou,



como todos os anos, unha conferencia-coloquio sobre a homosexualidade.

Outros grupos no 28-X

O 28-X non só foi celebrado polos grupos de gais e lésbicas no noso país, tamén foron varias as asociacións que organizaron actos ou levaron a cabo actividades para celebrar o Día da Libertación Homosexual. A Asemblea Galega da Muller (AGM) proxectou na Librería "María Balteira" a película "Go Fish". O sindicato estudantil MEU, a máis de acudir á concentración do 28, distribuíu follas informativas. Por outra banda, Esquerda Nacionalista, formación política integrada no BNG, tamén distribuíu follas informativas co gallo do 28-X. Ademais, as Xuventudes Socialistas de Galicia expresaron o seu apoio aos actos organizados polos diferentes colectivos homosexuais do país e ás reivindicacións neles expresadas.

Activistas lésbicas detidas durante un acto reivindicativo!!!

O día 27 de xuño foron detidas varias activistas lésbicas, o CGC descoñece aínda o grupo ao que pertencen (non é, de todos xeitos o CLL), que se manifestaban pacificamente e sen alterar o paso de vehículos ou peóns en frente ao Parlamento da Galiza. A falta de coñecer máis detalles sobre este gravísimo incidente, o CGC pensa pre-parar un comunicado de prensa e pór-se en contacto co grupo afectado para estudar medidas efectivas de protesta ante esta actuación policial.

Aprobouse-se a Lei de Familia

Durante este mes de xuño aprobouse no Parlamento da Galiza a denominada "Lei de Familia e da Infancia". O CGC, que xa dispón de varias cópias do texto aprobado, aprécia finalmente nel unha serie de mudanzas substanciais a respecto do texto do proxecto de lei presentado hai agora un ano. Apresenta-se unha definición de unidade familiar moito máis ampla, non condicionada en principio pola orientación sexual das persoas, nen pola súa

situación parental (é dicer, se se teñen ou non fillos). Polo tanto, parecen recoñecer-se as parellas de feito como familias de pleno dereito: dereito a unha vivenda digna, a axudas governamentais, etc... e mesmo á adopción!. Na cuestión da adopción, na que se establecen na lei unha serie de criterios de idoneidade para poder adoptar, non se fala da imposibilidade de facé-lo por mor da orientación sexual nen do estado civil d@ solicitante ou da súa parella. Por outra banda, o limiar de idade do que se considera poboación infantil reduce-se de 18 a 12 anos, e recoñece-se o status diferenciado da poboación adolescente. A falta dun estudo profundo deste importante texto lexislativo, o CGC acolleu-no con alegría e cautela, e pasará nas próximas semanas a estudia-lo polo miúdo cos seus colaboradores xurídicos. O CGC teme que este texto xeral e integrador poda ser modificado e coartado con regulamentos governamentais que non pasan por control parlamentario. Nese caso, o CGC pensa recorrer inmediatamente eses

posíbeis regulamentos discriminatórios por vía xudicial. Se queres unha cópia do texto da Lei, escribe-nos ou pasa polo local (só os luns no mes de xullo!).

Apresenta-se a campaña "Deixa-te ver!"

O CGC apresentou o pasado día 28-X a súa nova campaña "Deixa-te ver!" que pretende potenciar a visibilidade pública dos gais na Galiza sen traumas nen exhibicionismos. O folleto no que se basea a campaña ia ser presentado e distribuído no Maripicnic, pero a suspensión deste acto fixo que a campaña se presenta-se na festa desa mesma noite. O folleto, feito en colaboración co grupo "Mil-Homes", está a ter unha boa aceptación. Se tes ideas ou comentarios ao respecto non dubides en escribir ou pasar polo local.



Xa Sabes...

Escribe ao apartado 191 /
CP 15780 Compostela
ou por e-mail: gaicompos@hotmail.com

Ote...

Pasa polo noso local:
Rua Entremuros, nº 16, baixo
En Xullo: luns a partir das 20:30